

SAN PABLO KARTA GALAKIA KIWESUWE'SX JÏI

Galacia kiwesuwe'sxtxi weçxana fxi'jni

¹ Adxa' Jesukristo jxkaahnisa Pablo yaaseth. Naa kiwete piçthē'jwe'sx adxa's txhitxhçxa jxkaahnisameeth, wejxwa Jesukristo vxite' Dxus kwe'sx Tata na'wē uunijūwa ki' itxi vxitku txāawe'sx jxkaahnisath.

² Adx vxite' yakthē'jwe'sx ayte ũssa txāawe'sx yakh naa karta's fxi'jçxa kajaçthu Kristo nasa Galacia kiwesu pkhaakhena ũssawe'sxtxi weçxana.

³ I'kwe'sxtxi' Dxusa' pu'çxhina ewçxáa kaafxi'ze'jna vxite' kwe'sxtxi jxpe'jsa Jesukristo.

⁴ Txāa Jesukristo íik kwe'sx pkaltxi khūkhçxa ewmeejū nwe'weya' peekíi ya'dukhçxa kwe'sx pa'gate uu, Dxus jxthāasniçxá's kxtey yuuna.

⁵ Txāa pa'ga Dxusa's bagaçxtewa wala weçxawa'j jì'ptha'w.

Dxus yuwe vxite yu' meea'

⁶ I'kwe'sxa' Kristo nwe'wenijū txaçxmeyna tx-uteeçxa Dxus yuwe vxite fxiy kaapiya'jniçxá's nwēese'jna ũsta' jñi's jiyuçxa', adxa' wala kuh yaaki'th.

⁷ Ewte nvxiitwa'jsa Dxus yuwe vxite yu' meea', nawa i'kwe'sxtxi kaypuba'j wēeçxaçxáa maai' yu' Kristo kaapiya'jni's yu'pthehçxa fxiy kaapiya'jna ũsta'.

8 Nawa kwe'sx pta'sxtha'w txã'wēmée fxiy kaapiya'jna pa'jatxna Dxus yuwe' jīna aça' txã'wē yūusatxi' Dxus yuu iiméh seena' ewmeesata' jīçxa ivxiituwa'the nvxiitni yuutxna. Meeçxa' adx ma'th fxiy kaapiya'jna pa'j meeçxa' cielujũ kīisa angel ma'k txã'wē fxiy kaapiya'jna pa'j nawa txã'wē yūusa yuutxi' txã'wēçxaçxáa yuuni yuutxna.

9 Na'jī'th na': Maawa Dxus yuwe's pta'sxsatha'w jīçxawa fxiy pta'sxna pa'jatxna kwe'sx kaapiya'tha'w txã'wēmée aça' txãa nasatxi' Dxus yuu iiméh seena' ewmeesata' jīçxa ivxiituwa'theçxáa nvxiitni yuutxna.

10 Na'wēth we'we' aça' i'kwe'sxa' peekx mjiyuwe: adxa' naa kiwete piçthē'jwe'sx adxa's ew we'we jxthāasna ūsmeeth, naasáa Dxus kaaūusuthe'jniçxá'sthu āate we'we'. Sa' naa kiwete piçthē'jwe'sxtxi weçxaa jxthāasna ūsçxa', Kristona selpiisameeçxa txã'wē yu'nja.

Judiu jī'jmée vxite nasatx Dxus yuwe's pta'sxsa Pablo

11 Yakhthē'jwe'sx mjiyuwe: Na'wē Dxus yuwe ewte nvxiitwa'jsa's pta'sxi'th txã' piçthē'jwe'sx ūus yajkçxa kaapiya'jnisame'.

12 Txã'sa' adxa's naa kiwete piçthē'jwe'sx ūsmeeta', naasáa Jesukristo yuuçxáak kaajiyu'j.

13 I'kwe'sxa' jiiyã'jne'kwe adxa' nyafxí' judi- uwe'sx jxkaahni's nwēese'jna ūsçxa', ma'wētká fxi'ze', sa' ma'wētká seena' juuna' yuuna Kristo nasatx ahçe ivxiituya' sūhçxa.

14 Adxa' judiuwe'sx jxkaahni leya's kīhte yuhwa peejxmée jxukath kxtey yuuna ūssa yu',

adx ja'dawe'sx ũsu'tx txãawe'sxte jxthaakwe. Sa' adx yaçgawe'sx kaapiya'jni's adxçxáath iiméh ew kxtey yuusa yu'.

15 Txã'wē açesatewa, Dxusa' adxa's iiméh wala peeygãhçxa, mama tutxhuh kasehmeyna txhitxhçxa nvxiitnisa ne'tka yu'.

16 Txãasak txajx Nçxi'ka's jiyuwa'j en ähte', adxa's pa'yaçxa kaajiyu'j txã'wē txajx yuwe ewte nvxiitwa'jsa's judiu ji'jmée vxite nasatx pta'sxkahn. Aça' adxa' maa yuhtxwa paapējxya' u'jmeeth.

17 Jerusalente Jesukristo jxkaahnisawe'sx ũsu'tx txãawe'sxçxáa yuhtxwa thegya' u'jmeeth. Txã'wē yūupkaçxte wejxwa Arabia kiwenthu u'j, sa' txãa e'su sxawedçxa' Damaskonthu u'j.

18 Sa' tekh anxu skhēwnijūth Jerusalenna u'j, txãasath Pedro's jiyu, sa' kxtee ũsu'th txãa yakh e'z ki'su ähpkaçx.

19 Nawa Jesukristo jxkaahnisawe'sx vxite yu' jwee yu' uymeeth, naasáa Jesukristo nyakh Jakoboçxá'sthu uy.

20 Dxus dxi'pte isath we'we', na'wē kim yuhtxwa paapējxmeeth jīna fxi'jaçthu txã' ĩsxiinisame'.

21 Txãa e'su' Siria vxite' Cilicia kiwenthu u'j.

22 Aça' Kristo nasa Judea kiwesu ũsta' txãawe'sxa' adx yu'sa' iuymeeta',

23 naasáa na'jīniçxá'stxi wēse'j: Kwe'sxtxi ahçeçxa ivxiitu wēesaçxawa, açxha' Kristo's jxpa'gawa'ja's pta'sxna u'ju' jīni'stxi wēse'j.

24 Txã'wē wēse'jçxa', Dxusa's wala weçxatx adx txã'wē yūupa'ga.

2

¹ Katorce anxu skhēwnijũ' ki' u'th Jerusalenna, Bernabé vxite' Tito txāawe'sxtxi pe'jçxa.

² Txã'wē u'jwa'ja's Dxusku pta'sx txāa pa'gath adxa' u'j. Sa' kxtee Jerusالente jxkaahsawe'sxta' jĩni ũsu'tx txāawe'sx yakh dudte pkhaakheçxa txāawe'sxtxi pta'sxthu na'wē judiu ji'jmée vxite nasatx kaapiya'ja'th Dxus yuwe ewte nvxi-itwa'jsa's txã'sna. Txã'wēth pta'sx, txã'wēme' adx mjĩini' ewmeek yu' jĩwe'sxte.

³ Nawa Tito adx yakh kxtee ũsu'k txã'sçxáa yuhnawa kaacirkuncidaĩ'jmeeta', txã' judiu meek yu' na'swa.

⁴ Txã'wētewa txāa entey kwe'sx ksxavxyte u'katx kwe'sxwa yakthē'jwe'sxtha'w jĩna ĩsxiisa. Txāawe'sx yu' Tito's kaacirkuncidaĩ'j wēetx. Kwe'sx txã'wē yũumeeçxawa, Kristo Jesus yakh kwe'sx ew fxi'zeni's suw wēeçxatx peethegu'jya' u'ka, judiuwe'sx fxi'zenitey kaasxwedu'j wēeçxa.

⁵ Txã'wētewa, weh yuhwa txāawe'sx we'weni's kxtey yuumeetha'w, txã'wē Dxus yuwe isa pta'sxniçxá's i'kwe'sx nwēese'jna nes yuukahnthaw txāawe'sx we'weni's kxtey yuumée.

⁶ Kwe'sx txã'wē nwēese'jmeetewa, yakthē'jwe'sx jxkaahsawe'sxa' adxa's kaapiya'jwa'j fxiy yu' kĩh yuhwa yu'kxpehmeeta'. Makwe txāawe'sxa' walasa ne'ta yu', nawa adxa' txāatxi' thegu ji'phmeeth, txāa pa'gatey Dxus dxi'pte' maa yuhwa walasamée teeçxa na'wēçxaçxáatha'w naa pa'ga.

7 Txã'wẽ kaapiya'jwa'ja's fxiy yu'kxpehna pta'sxipkaçxte, wejxwa txãawe'sxa' jiyutx Dxus yuh idxa's kaahne', txajx yuwe ewsa's judiu ji'jmée vxite nasatxwa pta'sxkahn. Pedronawa ma'wẽga judiu ji'jçxáatx pta'sxwa'jsa nvxiht, txã'wẽy ne' idxa's vxite nasatx pta'sxwa'jsa nvxiht jĩnaçxáatx we'we.

8 Txãa pa'gatey judiuwe'sxçxáatx pta'sxwa'jsa Pedrona kaahsa Dxus íçxáak adxnawa kaah judiu ji'jmée vxite nasaa ksxavxysu.

9 Txajíçxáatx Jakobo, Pedro vxite' Juan txãawe'sxa' walasata' jĩnisaçxawa, kwe'sxtxi'sa' ma'jĩmée Dxus ne' txã'wẽ i'kwe'sxtxi's mjĩwa'jsa nvxiht jĩçxa weçxana kuse ũstxi adxna vxite' Bernabewe'sxtxi na'jĩna: I'kwe'sxa' judiu ji'jmée vxite nasa yakh mjĩine'kwe, naapkaçxha' kwe'sxa' judiu ji'j yakhçxáa mjĩ'nja'w jĩçxatx txã'wẽ kuse ũs.

10 Naasáa yakhthẽ'jwe'sx kĩhwa ji'phmée peejiina fxi'zesa yuutxi' pu'çxwa'ja's peçxkanamée yajxna fxi'zene'kwe jĩnaçxáatx neewe'we, açã' txã'sa' wala jxpa'yakx kxtey yu'th.

Ewte neeyũuya' judiuwe'sxwa Kristo's ũuste jxpa'gawa'ja'

11 Txã'wẽ Pedro' walasa' jĩnisatewa, adxa' txã'sa' wala juuna' we'weth, Antiokíate pa'jçxa' ewmeek yũuna ũsu' naa pa'ga.

12 Pedro' Antiokíate ũçxa', Jerusalenu Jakobo kaahnisawe'sx pa'jmeyna yu' judiu ji'jmée vxite nasa yakh pkhaakheçxa txãawe'sx yakh wa'lmeek ũ'we'. Nawa Jerusalenuwe'sx

pa'jyã'the', txuteeçxa pkhaakheme', txajx jì'j cirkuncidãynisawe'sxtxi ùukhçxak txã'wẽ yũu.

¹³ Aça' judiu jì'j Dxusna jiisa ùsu'tx txãawe'sxwa Pedro na'wëytxi yũu. Txãa pa'ga Bernabé yuhwa Pedrowe'sx yakhku utxáa.

¹⁴ Dxus yuwe ewte nvxiitwa'jsa' txã'wẽ jxkaaja'çme' na's txã'wẽ fxiy yuuçte', adxa' Pedro's wala juuna' we'weth pkhaakhesawe'sx ksxavxYTE na'jĩna: Idxa' judiuçxawa, ayte ùsçxa' vxite pa'jmeyna yu' judiu na'wëmeeg fxi'ze. Nawa ãçxh vxite pa'the yu', çkĩjxa'ga judiu jì'jmée vxite nasa yakha' utxaawa'jme' jĩsa na'wẽ yu'?

¹⁵ Kwe'sxa' mama tutxhuh kasejii judiu jì'tha'w yu', sa' Dxusna jiimeesa jì'j yu'çmeetha'w.

¹⁶ Makwe judiu jì'jçxawa, Moises leya'sçxáa yajkxte', maa yuhwa yuuwemée ewsa ya'yu'çme', naasáa Jesukristo's ùuste jxpa'gate yuuçxáak yuuwemeesa ewte ya'neeyũ'. Txajiiçxáatha'w kwe'sxa' judiuçxawa, yuuwemée ewte neeyũuya' sũhçxa Jesukristo's ùusuh jxuka yajkxçxa jxpa'ga, txã'wẽ ley jxkaahni yakha' yuuwemée ewte ya'neeyũ'çme' naa pa'ga. Aça' leya's yaakxsa' naa kiwete kim yuhwa yuuwemée ewte neeyũuwa'jsameeta'.

¹⁷ Txãasa ew yajkxte yu', makwe judiuçxawa yuuwemeesa yuuya' Kristo's ùuste jxpa'gameeçxa yu', pkalsaíiçxáa ne'tka'w. Txã'jite', leya's nvxihtçxa Kristoçxá's jxpa'gaçxa ne'tka'w yuuwe pkalsa yuu sũjuwá'kwe. Weh yuhwa txã'wëme'.

¹⁸ Moises leya's nwëese'jmeete ewna jĩçxawa, e'su ki' we'weçxa': Pejka nwëese'the ewna jĩna

we'wesa txã'wě yuuwesa yuuna.

¹⁹ Adxa' Moises leya's nvxihtçxawa ki' nwěese'jçxa' yuuwesa yuuya'mée txãa ley yakha' uusáa na'wěth yuu, Dxusçxáana nwěese'jya'.

²⁰ Adxa' leya's nwěese'jya'mée Dxus yakhçxáa fxi'zeya', Kristo yakh ja'da uusáa na'wěth yuu, Txãasa açxh itxi fxi'ze'th txã' adx jñime', adxna itxi kaafxí'ze'jsa Kristo jñi'. Txãasath naa kakwe yakh itxi fxi'ze'ççxawa, na'wě Dxus Nçxi'k adxna peeygãhçxa peekíi ya'dukhçxa uuk adx pa'gate txãa yakh yuuçxáa fxi'ze'.

²¹ Txãa pa'ga Dxus peeygãhçxa ewte nvxiitni's weeçx wěemeeth. Txã'wě leya's nwěese'pha'gaçxáa yuuwemée ewte neeyũuwaça', Kristo uuni' kxulne' yuuwa'j yu'. Nawa txã'wě yuume'.

3

Leypa'ga Dxus Espiritu's ya'jypa'ga'çme'

¹ Galacia kiwesuwe'sx, wala yuh jiimeesa yuui'kwe. I'kwe'sxtxi' ¿kimga txakwe wala ãxii açkwe Dxus yuwe isasa's nvxiht? I'kwe'sx txã'wě yuukahmeníi tha'w kwe'sxa' áate pta'sx Jesukristo kluuskhě uusáa kimtewa.

² Mpeeta'sxwe: I'kwe'sxa' ¿Moises ley jxkaahni's nwěese'jçxakwe Dxus Espiritu's jxpa'ga'? Meeçxa' ¿kwe'sx pta'sxni's nwěese'jçxakwe Dxus Espiritu's jxpa'ga'?

³ I'kwe'sxa' pejka txakwe yu' wala jxpub-awa'jmeetena Dxus Espiritu i'kwe'sx ũuste

pu'çxya' takhni's ¿ma'wě i'kwe'sx kakweju pa'pçxuçxa Dxus Espiritu takhni's jxã'jaki'kwe?

⁴ Dxus yuwe's wěse'pha'ga nakwe wala pkxuuni yuui'kwe nawa Dxus yuwe isa pta'sxni's nvxihtçxa', kxulteçxáa pkxuunisa yuune'kwe. Txakwe kxulteçxáa yu' pkxuuni yuumeewaç wejx ewna.

⁵ Dxusa' txajx Espiritu's ũsçxa', kim yuhwa ājanimeesa's kījkihwa kaavxya'ja'ja'k i'kwe'sxtxi ew jiyukahñ pu'çxna sa' ¿ley jxkaahni's kxtey yuupa'gaga txã'wě yuuá'? Meeçxa' ¿kwe'sx pta'sxni' isasa yuhna sũhna jxpa'gate wá' txã'wě yuu?

Abrahan yakh Dxus puutx we'weni

⁶ Abrahana's miijajkxwe: Txã' ũusuh yuuçxáak Dxusa's jxuka yajkxna nwěese'j. Aça' txã'wě yũuteçxáa Dxusa' Abrahana's yuuwemée ewsak vxit.

⁷ Txãa pa'ga i'kwe'sxa' mjiyuwe: Dxusa's ũusuh yuuçxáa jxuka yajkxna nwěese'jsa yuuçxáa Abraham jī'j yuutxna.

⁸ Txã'wě judiu jī'jmée vxite nasawa Dxusa's ũusuh jxuka yajkxna nwěese'theçxáa txãawe'sxtxiwa yuuwemée ewsa vxitwa'ja's dxiikhēy pta'sxnik yuu Abrahana's na'jīna: Maa nasawa jxuka ewsa yuutxna iidxpaga yuuçxáa jī'k Dxus librute.

⁹ Txãa pa'ga maawa Dxusa's ũusuh yuuçxáa yajkxçxa nwěese'jsa' Abraham na'wēy yuuwemée ewsata' açxwe'sxwa.

¹⁰ Aça' Moises ley jxkaaja'k txã'sçxáana kxtey yuusa': Iiméh seena' ewmeesata' jīna Dxus yuu

we'weçxa', ivxiituwa'the nvxiitni ũsta'. Txajíik Moises ley íiwa na'wě we'we': Maawa ley jxkaah-nitx jxuka kxtey yuusame', ivxiituwa'the nvxiitni yuutxna jĩ'k.

11 Aça' txã'wě leya'sçxáa nwěese'jsa' kim yuhwa Dxus dxi'pte yuuwemée ewsa yu' meeta'. Txajíik áate na'wě pta'sxi' Dxus librute': Dxusa's ũusuh jxuka yajkxteçxáa Dxus dxi'pte yuuwemeesa yuwa'ja's ya'ji'phuna jĩ'k.

12 Aça' Moises leya' Dxusa's ũusuh yaakxwa'ja's we'we'çme'. Txã'wě ũusuh yaakxwa'ja's we'wemeeçxa íik na'wěçxáa we'we': Maawa jxkaahna fxi'jçxa nvxiit-nisaçxáatx jxuka kxtey nwěese'jwa'ja' itxi fxi'zeyá' jĩ'k.

13 Txã'wě leya's jxukamée nwěese'pha'ga iiméh seena' yuuwesatha'w yu', txáa pa'ga Kristok kwe'sx iiméh seena' yuuwesa pa'gate uu, ley kastigāyni kwe'stxi nwe'weya'. Txã'wě iiméh seena' yuuwesa's kastigāyni uuwa'ja's na'wěk pta'sxi' Dxus librute: Íiméh seena' yuuwesa's maawa fxtūukhē a'kxçxa ikhni yuuna jĩ'k.

14 Txã'wě Kristo Jesus kwe'sx pa'gate uupa'gatha'w judiu ji'jmeeçxawa Dxusa's ũusuh jxuka yajkxna nwěese'pha'ga yuuwemée ewsa yuuçxa Dxus Espiritu's jxpa'gawa'jsa yuu. Txã'wě yuwa'ja'sku Dxusa' Abrahan yakh puutx we'we txã' kxtey yuuk.

15 Yakhthē'jwe'sx, na'wě yūuni's miijajkxwe: Kwe'sxa' kīh yūuya' puutx we'weçxawa txã'sa' peçxkanamée kxtey yuuya' jxuka eçte fxi'jçxa peekx yase's ki'pçxak ya'nvxiitu'. Aça' txã'wě

yũuni's kim yuhwa ãsxiini' jãya' ãja'çmeeta', sa' yu'pthejxa'wa ãja'çmeeta'.

¹⁶ Txã'wēy Dxuswa Abrahan yakh ew pu-
utx we'weçxa nvxiitni's kim yuhwa yu'pthejxa'
ãjameetxna vxite' Abrahan ji'j yakh puutx
we'weni's. (Dxus we'weçxa': Iidx ji'jwe'sx
jĩ'çme', naasáa teeçxçxáak kxsusu': Iidx ji'j
jĩnaçxáa. Txãa yu' Kristo's we'weçxak txã'jĩ'.)

¹⁷ Na'jĩ'th na': Dxusa' ũswa'ja's kxtey yuuya'
Abrahan yakh ewku puutx we'weçxa neeyũu,
açã' txãa puutx we'weni kuartocientos treinta
anxu skhēwnijũk Moises leya' kasehna ũsu'.
Naa pa'ga txãa leya' Dxus ew puutx we'weçxa
nvxiitni's yu'pthejxa' ãjawa'jsame', e'su kasehsa'
naa pa'ga.

¹⁸ Moises leypa'ga ewte neeyũuwa'ja's
jxpa'gawa'jsawaça', dxiikhēy Dxus puutx
we'weni' selpiwa'jmée ne' yu'. Nawa txã'wē
yũumée, ewte neeyũuwa'ja's Dxusa' Abrahan
yakh ew puutx we'weçxa neeyũuk txã' Moises
leypa'gaméek jxpa'gawa'j yu'.

Leya' na'wēçxáa yuusa'

¹⁹ Txã'wēte', Moises leya' çkĩhtega selpi'?
Ewmée yũuna fxi'zepa'ga yu'kxpehna fxi'çxa
nvxiitnisaçxáak yu'. Sa' Dxus Abrahan yakh pu-
utx we'weçxa': Iidx ji'j jĩk txãa pa'phkaçxçxáak
txãa leya' jxkaahwa'jsa yu'. Txãa leya's fxi'çxa
nvxiit-sa yu' Dxus angeleswe'sxçxáatx yu', açã'
Moisesku jxpa'gaçxa jweeju yu' nasatx kaapiya'j.

²⁰ Nawa ewte neeyũuwa'ja's Dxus puutx
we'wek txã'sa' angeleswe'sx jxpa'gaçxa peena
Abrahana's ũsmeeta'. Txã'wē yũumée, Dxus

yuuk txajx yuweju ewte neeyũuwa'ja's puutx we'we.

²¹ Txã'jĩte', Moises ley yakh Dxus puutx we'wenisa yakha' utxaaya' ãjawa'jsamée iipuiisatxna sũjuwá'kwe. Txã'wēsameeta'. Aça' ley txã'wē ewte neeyũuwa'ja's ũsya' ãjawa'jsawaça', leya's nwēese'jsa yu' jxuka ewte yã'j ũs yu'nja'w.

²² Nawa txã'wēmeete íik leyíi we'weçxawa: Jxukaysa pkalte yuuçxáa ũsta' jĩ'. Txãa pa'ga Jesukristo's ũsuh jxuka yajkxçxa yuuçxáa kwe'sx ewte neeyũuwa'ja's Dxus puutx we'wek txã'sa' jxpa'gawa'jsatha'w.

²³ Txã'jĩte', Moises leya' Dxus puutx we'weni's açesana sũjuwá'kwe. Weh yuhwa açesame'. Wejx yuuwa leya' kwe'sxtxi jxaawna ũssak yu' Jesukristo's ũuste jxpa'gaçxa ewte neeyũukahn.

²⁴ Leya' naasáa Kristo kĩhpkaxç kwe'sxtxi jxpe'jsaçxáak yu', kxah Kristo kĩhte', txã'sa' ũuste jxpa'gaçxa' yuuwemée ewte neeyũuwa'ja's ji'phukahn.

²⁵ ãçxha' Kristo's ũuste jxpa'gawa'j en ãjk, aça' txãa ley kwe'sxtxi jxpe'jsa's peena yu' yaakxwa'j ji'phmeetha'w.

²⁶ Txãa pa'ga i'kwe'sxa' Kristo's ũsuh jxuka yajkxçxa nwēese'pha'gaçxáa Dxus luuçx yuui'kwe.

²⁷ I'kwe'sx jxukaysa Kristo yakh fxi'zeya' sũhçxa yu'te ya'bautisãysa' txajx kusete jxpe'jni ũsi'kwe.

²⁸ Açxha' maa yuhwa puutx iwejçx yaakxwa'jme'. Judiu ma'k yuu meeçxa' judiumée ma'k yuu, patron ji'phsa ma'k yuu meeçxa'

patron ji'phmeesa ma'k yuu, piçthê'j ma'k yuu meeçxa' u'y ma'k yuu nawa maa yuhwa puutx iiwejçx yaakxwa'jme', txãa pa'gatey Kristo Jesus yakh fxi'zesa' maa yuhwa thaakwemée jxukaysa puutx txãa na'wêçxaçxáa i'kwe.

²⁹ I'kwe'sxa' Kristo's jxpa'gasaçxa', Abrahan ji'jçxa txã'wê yuune'kwe, sa' ewte neeyũuwa'ja's puutx we'wek txã'sa' jxpa'gawa'jsai'kwe.

4

¹ ãçxha' na'sna mjiyuwe: Luuçxa' ney uute', le'çxkuëy yu' vxite thê'jsa kusetek jxpe'jni fxi'ze' walaaçxa yu', ney nvxiitni's jxuka txãaçxaçxáa jxpa'gawa'jsaçxawa.

² Aça' le'çxkuëy yu' thê'jsatx thegna jxpe'je', makwe txaçxpkaçx ne' neya' neewe'weçxa thê'jsa kusete jxpe'khan nvxiht txãa en âhpkaçx.

³ Kwe'sxwa txã'wëysatha'w yu'. Luuçxwa ma'wêga le'çxkuëy yu' thê'jsa jxpe'jni fxi'ze', txã'wëythaw nyafxii yu' ley jxkaahni txajx kusete fxi'zena ũsu'.

⁴ Nawa makwe txaçxpkaçx ne'tka'w jxpe'jni fxi'zewa'jsa yu' txãa en pçuute', Dxusa' txajx Nçxi'ka's kaakh, teeçx u'y kakwete kasehçxa judiwe'sx na'wëy leya's nwëese'jwa'jsa.

⁵ Aça' kwe'sxa' ley jxpe'jni ũstewa, txã'wê yũuçxak txãajũ kutxi'jçxa Dxus luuçx yuuwa'ja's ũs.

⁶ Txãa pa'ga i'kwe Dxus luuçx yuuna pa'j, aça' Dxusa' txajx Espiritu's i'kwe'sx ũuste kaakh, ãçxha' Dxus luuçxtha'w sũhwa'ja's ji'phukah. Txajk Dxus Espiritu' i'kwe'sx ũuste kaaũusuthe'je' Dxusa' kwe'sx Tata' sũhwa'ja's.

7 Txãa pa'ga ãçxha' i'kwe'sxa' ley jxpe'jnisamée, Dxus luuçxi'kwe. Aça' txajx luuçx yuupa'ga Dxusa' txãa jĩ's kīhnawa jxuka i'kwe'sx jīiçxaçxáa nvxiituna Kristo nwe'wepa'ga.

Ley jxkaahnite ki' sxawedsatx yu'kxpehni

8 I'kwe'sxa' nyafxii yu' Dxusa's jiimeeçxa', Dxusmeeçxáatx i'kwe selpiina fxi'zesa yu'.

9 Nawa ãçxha' Dxusa's jiisa yã'ji'kwe meeçxawa Dxusa' i'kwe'sxtxi jiia' aça' çkĩjxa'çxáa ki' sxaweduki'kwe piçthē'jwe'sx kaapiya'jni açxamée seelpisate fxi'zeya'?

10 Txã'wē Dxusa's jiiyã'jçxa', ley jxkaahni entxi ki'sna, a'tetxwa ki'sna, anxutxwa ki'sna nwēese'jwa'j ji'phmeei'kwe.

11 Txãa pa'gath txã'wē yūuçte uyçxa wala yaaki': Kxulçxáa wá'ntka i'kwe'sxtxi kaapiya'j sūhna.

12 Txãasath yakthē'jwe'sxtxi neewe'we', adxwa ma'wētká ley kaapiya'jni's jxuka nvxihtçxa i'kwe'sx na'wēy ley jxkaahnimée fxi'zena ũsu' txã'wēy yuukahn.

13 Txã'wē adxa' kxtee uuya' ũsçxa', i'kwe'sxtxi nyafxçxah Dxus yuwe's pta'sxte',

14 ãça'na ũstewa ahçemée wejxwa Dxus angel meeçxawa Jesukristo thasi'kwe weçxana jxpa'ga adxa's.

15 Nawa txagaçxtey wēt weçxana yaakxnisa' çmteega yuu? Na'jĩ'th na': Txagaçxhíi yu' adxna peeygãaweeteçxáa i'kwe'sx yafxtxi kutxi'jçxa adxna ũsya' ãjawaça', txã'wē yūuwa'jne'kwe yu'.

16 Nawa âçxha' isasa's pta'sxsa yu's açesa na'wê yuuna ũsi'kwe adxa's.

17 Kxsũ i'kwe'sxtxi kaapiya'jsawe'sxa' i'kwe'sxtxi txãawe'sx ju'gutx tuphi jxthãasu'. Nawa ew yajkçxa txã'wê yu'çmeeta', naasáa adx kaapiya'jniñũ txude wêçxaçxáa txã'wê yũuna ũsta', i'kwe'sxa' txãawe'sx yakh u'khan.

18 Txã'wê vxitesatx peekx ju'gu tuphywa'j yuja', nawa bagaçxtewa ew yũuwa'jçxá's yajkçxa txã'wê yũuwa'ja', sa' adx kxtee i'kwe'sx yakh ih ũsteçxáa txã'wê ew yũusáa na'wê fxi'zewa'jme'.

19 Luuçxwe'sx, adxa' i'kwe'sx txã'wê yũupa'ga iiméh wala akate nxusna ũsthu, u'y nasate yaakasáa na'wê. Sa' nxusna nes yu'nja i'kwe'sxa' Kristo na'wêy fxi'zeya' âjapkaçx.

20 Adxa' âçxhíith kxtee i'kwe'sx yakh ũs wêje', i'kwe'sx jxpubana yaakxni's yu'pthejxa'. Nawa jiimeeth i'kwe'sxtxi ma'wê pu'çxwa'ja'swa.

Sara Agar yakh kaaja'da'jni

21 I'kwe'sxa' ewte neeyũuya' sũhçxa' Moises leya's i'kwe yaaki', sa' txãa leya' na'wêsaçxá' txã'sa' jiyu'çmeewá'kwe.

22 Txã'sa' jiyukahn na'wê fxi'jni ũsa' Dxus librute: Abrahana' e'z luuçxku ji'phu jĩ'k. Teeçxsa' peekx nyuutewe'sxmée, yatte selpisáa u'ytewe'sxku yu', aç'a' vxite nçxi'ka' peekx nyuutewe'sxku yu'.

23 Aç'a' yatte selpisaate kasehsa' kíhwa meesa peekx vxyaasaçxáak yu'. Nawa peekx nyuute kasehsa' na'wê Dxusa' Abraham yakh puutx we'weçxa': Luuçx ji'phune'kwe jĩk txãak yu'.

²⁴ Txãa e'z u'ya' na'wēsata': Na'wē Dxus e'zsa yakh puutx we'wek Abrahan vxite' Moises yakh txãata' txãa e'z u'ysa'. Dxus puutx we'weni teeçxsa' Sinaí vxiç walatek yuu, açã' kxtee puutx we'weni' Agarwa ma'wēga vxitee jxkaahni selpiina fxi'ze txã'wēsa'. Txãasa íitx txãa puutx we'wenijũ upxsa' ley jxkaahnitx selpiina fxi'zeya' kaseje'.

²⁵ Agara' Arabia kiwesu Sinaí vxiç wala na'wēsa'; txã'wēy naa ensu Jerusalen ũsa' txãawa txãa Sinaí na'wēysa'. Txajiiçxãa txãa çxhabe ũssa judiuwe'sxa' vxitee kusete jxkaahnisawe'sxta'.

²⁶ Naapkaçxha' cielute Jerusalen çxhabetewe'sxa' vxitee jxkaahni fxi'zesameeta'. Kwe'sxa' kxteewe'sxtha'w thaakwesa.

²⁷ Txã'sna we'weçxak Dxus librute na'jĩ': U'y nasa ji'phuwa'jmeesaçxawa, nxusmée wēt miiyajkxwe. Weçxana sus mwe'wewe, nasate yaakani's jiméeçxawa.

Txãa pa'gatey luuçx ji'phuwa'jmeesaçxawa, Luuçx ji'phuwa'jsate jxthaakwe luuçx ji'phuna jĩ'k.

²⁸ Yakhthě'jwe'sx, kwe'sxa' Dxus puutx we'weçxa': Luuçx ji'phune'kwe jĩk txãatewe'sxtha'w Isaak na'wēsa.

²⁹ Txãa entewa ma'wēga selpiina fxi'zesa luuçxa' Dxus puutx we'wenite kasehsa luuçxa's ahçena kiite, açxhwa txã'wēyçxãa yũuna ũsta'.

³⁰ Txãa ente txã'wē açepa'gak na'wē yũuni's Dxus librute pta'sxi': Txãa u'y selpisa's pçxi'k íitx mkuutxi'j. Txã'wēme' selpisãa nçxi'ka'

peekx nyuute nçxi'k yakh ja'daçxah jxpa'gaya' ãjameena ney nvxiitni's jĩ'k.

³¹ Nawa kwe'sxa' selpisáa nçxi'k na'wēsameetha'w, wejxwa nyuute nçxi'k na'wēsatha'w.

5

Ley jxkaahnimée fxi'zeni

¹ Kristo' ley jxkaahnijũ txuhdek, kwe'sxa' ley jxkaahni fxi'zekahmen. Aça' i'kwe'sxa' ewte pa'jyã'jçxa', peena yu' utxaanuwe ley jxkaahni's nwēese'jya'.

² Ew mjiyuwe: Adxa' na'jĩ'th na', i'kwe'sxa' cirkunciona's jxpa'gawá'kwe aça' ley jxkaahnijũ Kristo nwe'wek txã' kxul yuuna.

³ Ki' kaayaki'jiçthu: Maa piçthē'jwa ya'cirkuncidã yã'jçxa', txã'sçxáana jxpa'gamée, Moises leya's jxuka nwēese'jwa'j ji'phta'.

⁴ Leya's jxuka kxtey nwēese'jçxa yuuçxáa yuuwemée ewte neeyũ'nja sũhna yaakxsa', Kristo tasxu txutesáa yuune'kwe, sa' Dxus peeygãanijũwa txutesáa yuune'kwe.

⁵ Nawa kwe'sxa' Kristo's ũusuh yuuçxáa jxuka yaakxwa'ja's Dxus Espiritu pu'çxte', txã'wē yũuçxaçxáa yuuwemée ewsatha'w yuu.

⁶ Txãa pa'gatey Kristo Jesus yakh fxi'zesa yakha' cirkuncidãyni ma'k yuu cirkuncidãynimée ma'k yuu nawa txã'wēsa' peejxme', naasáa Kristo's ũuste jxpa'ganiçxáa txã'wē', txãa pa'gatey Kristo's ũuste jxpa'ganiijũ' peeygãawa'ja's ya'ji'phu'k naa pa'ga.

7 I'kwe'sxa' ew yã'ji'kwe fxi'zena ũs yu', aça' ɔkinga nwēese'khamen kaypuba'jna pa'j?

8 I'kwe'sxtxi kaypuba'jna pa'jsa' Dxus kaahnisa yu'çmeeta'.

9 Txãa pa'ga mpa'yajkxwe. Txã'wēme', lewadura' le'çxkuēeçxawa jxukak pēetheje' sku-utxh ũ'we makwetewa.

10 Txã'wētewa i'kwe'sxa' txakwe yu' jxpubakahmen Kristo' pejka pu'çxhina sūju'th. Nawa Dxusa' seena' yuh kastigaĩna kaypuba'jsa's kintewa.

11 Yakhthē'jwe'sx, miiyajkxwe: Adxa' txã'wē cirkuncidāywa'ja's kaapiya'jwaça', judiuwe'sxa' adxa's ahçemeetxna. Txã'wē yuuwaç yu', Kristo' nwe'weya' kluuskhē uuk jĩna pta'sxnisa' kaaũsçxa'jmeena judiuwe'sxtxi'.

12 Nawa txã'wē i'kwe'sxtxi kaacirkuncidaĩ'j wēena kuçx yuuna fxi'zesa' peekx kakwetewe'sxa's tee jwed jxuka ya'spē'thwaça', jiyutxna sūju'th adxa'.

13 I'kwe'sxtxi' cirkuncidāykahmenĩ ley jxkaahnijũ nwe'wenisa yã'ji'kwe yuu. Nawa txã'jĩte', ãçxha' leya' we'wewaj ji'phmeena sũhçxa peekx ma'wēwa ewmēe yũuna fxi'zewa'jme', wejxwa vxitetx peeygãhna puutx ya'selpiina fxi'zewa'ja'.

14 Txãa pa'gatey leya' txã'wē yũuwa'ja'siçxáak wejx thaakwe neewe'we' na'jĩna: Peekĩ ma'wēga ya'peeygãja', txã'wēy mpeeygãh maatxwa jĩ'k.

15 Nawa txã'wē yũumēe puutx puiina yahçena fxi'zesa' jxuka ja'daçxah puutx pçuune'kwe jxpa'yakxmeeçxa'.

Kwe'sx ũus yaakxni vxite' Dxus Espiritu kaaũusuthe'jni

16 Txã'wẽ yũuwe'sxte na'wẽ yũuwa'ja'sthu pta'sxi': Dxus Espiritu ew kaaũusuthe'jniçxá's kxtey yuuna mfxi'zewe, peekx ũusuhçxáa yaakxni's kxtey yuuya'mée.

17 Txã'wẽme', kwe'sx ũusuhçxáa yaakxnisa' pejka yuh ewmeesa'sku yaaki'. Txãa pa'ga Dxus Espiritu' kwe'sx ũus yaakxni's jxpa'gaçme', naapkaçxha' kwe'sx ũus yaakxni' Dxus Espiritu's yupu'k. Txãa pa'ga ne'kwe pejka yuh ewmeesaçxá's kxtey yu'.

18 Nawa Dxus Espiritu i'kwe'sx ũuste jxkaahna ũste', jxpubana ley jxkaahnite fxi'zewa'jsameei'kwe.

19 Dxus Espiritu kaaũusuthe'jnimée peekx ũusuhçxáa yaakxnisa' naata': ptamumée pkal yuuni, ptamsaçxawa vxitesa yakh pkal yuuni, ma'wẽwa kazx pkal yuuni,

20 dxus itximeesatx neewe'weni, dxijxuuni, ahçena fxi'zeni, puiini, ipxãani, ũusçxani, pui- iwa'ja's ma'wẽwa yũuna pakwení, pkhaakhesa yakhthẽ'jwe'sx puutx puiiçxa txutení,

21 vxitesa ji'phunitx açeni, nasa ikhni, tũuna fxi'zeni, tũusáa pwe'sx ma'wẽwa kazx yuuni, pkal ma'wẽsawa ũsta' txãatx kxtey yuuni. Txã'wẽ yũusatxi' adxa' áate pta'sxiçthu: Txãawe'sxa' Dxus jxkaahna ũsnite u'kawa'jsameeta'. Txã'sa' nyafxíwa pta'sx yã'th.

22 Açxha' Dxus Espiritu kaaũusuthe'jni' naata': peeygãani, weçx weçxa fxi'zeni, ũuste ewçxáa yaakxni, ũusçxa yajkxmée fxi'zeni, maatxwa

peeygãhna fxi'zeni, vxitesatx pu'çxna fxi'zeni, wa'lmée nwēese'jna fxi'zeni,

²³ iiwejçx yajkxmée fxi'zeni, ũuste ewmée ũusutheni's nwēese'jmée fxi'zeni. Txã'wē ew yã'j fxi'zesa's leya' thegwa'j ji'phme'.

²⁴ Kristo nasa yã'ja', peekx ũus yaakxni ewmeesa's kxtey yuuna fxi'zewa'j ji'phmeeta'.

²⁵ Dxus Espiritu txã'wē ew fxi'zewa'ja's ũste', txãa yakh yuuçxáa fxi'zewa'j ji'ptha'w nwēese'jna.

²⁶ Iiwejçx yajkxna puutx puina ahçena fxi'zewa'j ji'phmeetha'w.

6

Puutx pu'çxna fxi'zeni

¹ Yakhthē'jwe'sxtxi neewe'we'th: Maa yakhthē'jwa āhmée yūuni's jiyuçxa', txã'sa' myu'kxpehwe, i'kwe'sxa' Dxus yakh çxhãçxha yã'j fxi'zesai'kwe naa pa'ga. Nawa wala jxpa'yakx weeçx we'wemée myu'kxpehwe. Txã'wēme' i'kwe'sxtxiwa wetewa'j en pa'jawáana.

² Teeçxsa na'wēçxah puutx ya'mpu'çxwe thēyte fxi'zeni's. Txã'wē yūuçxa Kristo jxkaahni's kxtey yuusáa yuune'kwe.

³ Kĩhtewa jwee yu' thaakwe ewsameeçxa txã'wē iiwejçx yajkxçxa', ĩsxiisa yuuna.

⁴ Txãa pa'ga peekx fxi'zeni's khuē'y yaakxwa'j ji'pha' ¿ma'wēsaki'th? sūhna. Txã'wē peekx fxi'zeni ewtewa jiyuçxa, wēt wēt yaakxwa'ja', nawa vxitesa fxi'zeni's weeçxwa'j ji'phme'.

⁵ Teeçxsa na'wěçxah peekx fxi'zeniçxá's wala jxpa'yaxxwa'ja'.

⁶ Kristo jxkaahni's kxtey yuuna kaapiya'jsa's pu'çxwa'j ji'pha' peekx ji'phuni kīh yakhçxáawa.

⁷ I'kwe'sxa' ya'jypubanuwe naa sūhna: Kīhwa yūutewa, Dxusa' txakwe yu' jiyumeena sūhna. Dxusa's kim yuhwa txā'wē yu' yajxna weeçxmeena. I'kwe'sx kīh yūuçxawa txā'wēysaiçxáa jxpa'gane'kwe.

⁸ Meeçxawa peekx ūus yaaxni ewmeesaçxá's kxtey yuusa', uuwa'ja'sçxáa ji'phuna txā'wē yūupa'ga. Nawa Dxus Espiritu kaaūusuthe'jni's kxtey yuusa' багаçxte yuhwa pçumée ĩtxi fxi'zewa'ja's ji'phuna.

⁹ Txāa pa'ga ew yūuwa'jçxá's wahtxmée kxtey yuuna fxi'zewa'j ji'ptha'w. Txā'wē ew yūuwa'ja's wa'lmée kxtey yuuna ūsçxa', ewsa's jxpa'gawa'j en āhte', jxpa'ga'nja'w.

¹⁰ Txāasa ma'wēn entewa vxitetx ew yūunaçxáa fxi'zewa'j ji'ptha'w, sa' Dxus yakh fxi'zesa kwe'sx yakthē'jwe'sx yuutxi' wejx txā'wē ew yūuwa'j ji'ptha'w.

Peekx kakwetewe'sxa's yajxmée Kristoçxá's weçxani

¹¹ Mthegwe, adx kuseju yuu ew āate fxi'jaçthu, i'kwe'sx jiyukahn.

¹² Kristo kluuste uuni's pta'sxpa'ga yaaçeni fxi'ze wēemeeçxaçxáa, txā'wē i'kwe'sxtxi' kaacirkuncidaĩj wēena ūsta'.

¹³ Txāawe'sxa' makwe ya'cirkuncidāyçxawa, ley jxkaahni's jxuka yu' kxtey yu'çmeeta'. Nawa i'kwe'sx yuutxi' cirkuncidāykaja'tx, txā'wē

kaacirkuncidaĩ'tha'w sũhna weeçx weeçx yaakx wëeçxatx txã'wë yu'.

¹⁴ Nawa adxa' kĩh yuhnawa weeçx weeçx yaakx wëemeeth, naasáa kwe'sxtxi jxpe'jsa Jesukristo kluuste uuni yuuçxáak adx ũuste wët wët kaaũusuthe'je'. Kristo kluuste uupa'ga adx yakha' naa kakwetewe'sxa' seelpisame'. Txãasa adxa' naa kakwetewe'sxa's nwëese'j wëemeeth, uusáa na'wë.

¹⁵ Txãa pa'gatey Kristo Jesus yakh fxi'zesa yakha' cirkuncidãyni ma'k yuu meeçxa' cirkuncidãynimée ma'k yuu nawa txã' kĩhwa meesa', naasáa ewmée ũus yaakxni's yu'pthehçxa fxi'zenisaçxáa seelpisa'.

¹⁶ Na'wëth jxkaaja' txã'sa' kxtey yuuna fxi'zesa' Dxus peeygãani ew fxi'zewa'ja's jxpa'gatxna Dxus luuçx jxukaysawe'sx.

¹⁷ Açxha' naajũ' peena yu' kimwa kuçx yuuni peejxmeeth. Kuçx yuukahmení adxa' Jesusa's seelpisaath, txãa pa'ga pkxuuni kakwete snxal ji'pthu.

¹⁸ Yakhthẽ'jwe'sx, kwe'sxtxi jxpe'jsa Jesukristo' i'kwe'sx jxukaysatx pu'vxitumée pu'çxhina.

Dyus Yuwe U'sesa
Páez: Dyus Yuwe U'sesa New Testament

copyright © 2011 Wycliffe Bible Translators, Inc.

Language: (Páez)

Contributor: Wycliffe Bible Translators, Inc.

All rights reserved.

2020-11-30

PDF generated using Haiola and XeLaTeX on 18 Apr 2025 from source
files dated 29 Jan 2022

06da09f4-8d0f-5001-ae8c-0e6aa0131ffd